

# Era istòria de Torrons i Mel Alemany

Nòm:

Grop:

**Ua protagonista, era mèu, e cinc generacions dedicades a apropar-la damb diferenciacion e qualitat ara poblacion.**

Tà conèisher es origines de Torrons i Mel Alemany auem de viatjar tà darreries deth sègle XIX tà Os de Balaguèr, un municipi dera província de Lhèida, a on viuie era senhora Mundeta, qu'elaborau de manèra artesanau un tipe de mochet hèt damb mèu e sucre. Aguest doç ère diferent e deliciós. Per aquerò, lèu subergessec e lo venie en pòble e ena comarca. Mès tard, eth sòn hill i incorporèc fruts secs e atau comencèc a hèr torrons que portauen aueràs, mèu e blanc de ueu.

A principis deth sègle XX, era següenta generacion, eth senhor Miquel Alemany i Boix, inicièc era activitat dera produccion de mèu. A mès, hège docí que comercializaue en hèires e hèstes. Mès damb er esclat dera Guèrra Ciuu e era postguèrra era activitat demorèc interrompuda.

Non siguec enquias ans 70-80 quan eth hill deth senhor Miquel Alemany creèc era estructura actuau deth negòci, gràcies ath bon moment sociu e economic deth país e, en especiau, dera ciutat de Barcelona. En aqueth periòde neishc era mèrca Torrons i Mel Alemany. Pòc a pòc era activitat s'aluenhèc dera produccion de mèu e se centrèc ena crompa de mèu as apicultors.


Enes ans 90 era mèu ère era activitat principau deth negòci. E aué en dia Alemany ei ua empresa expèrta ena seleccion dera gamma de mèus dera Peninsula Iberica (un des milhors lòcs de produccion de mèu deth mon gràcies as floracions e as microclimes existents), e ara venda posteriora. Tanben cau remarcar era fabricacion de torrons de diferenti gusti e textures tà Nadau e era exportacion tà d'auti paísis. Es frairs Ferran e German Alemany son era cincau generacion que da continuïtat ath negòci.

En çò que hè ara mèu, an un gran suenh ara ora de crompar-la. Sonque aquerissen mèus produsides ena peninsula Iberica e dirèctaments deth productor entà assegurar-ne era qualitat.

Entre es sòns productes de mèu i a es mèus monofloraus coma era der irangèr, eth casse verd, er eucaliptus, eth romanin, lavanda, etc; es mèus de gelea reiau e pollèn, beneficioses entara salut; es especialitats coma era plata damb ua pèça de bresca o es diuèrsi estugs de mèus variades, e es mochets.

Alemany a creat era "mèu gourmet"; un concèpte nau de producte que combine un tipe de frut sec deth territòri amèlles de Lhèida, auerassi de Reus, etc.) amassa damb ua classa de mèu monoflorau. Tanbe a presentat naues proposicions de producte com era Nutella damb base de mèu.

Torrons i Mel Alemany ei ua empresa familiara d'esperit dubèrt e innovador, sustot damb era mèu. Ua pròva d'açò ei eth convèni damb era Fundacion Alícia -un centre de recèrca de codina- tà que les ajude a portar ara practica naues idees de producte. Ath delà, an explorat e materializat era combinacion deth vinagre e dera mèu amassa damb era empresa Vinagres Badia.





Per ua auta part, enes darrèri ans a neishut era iniciativa Univers Alemany tà colaborar damb eth mon der art e era cultura. Desiren mèter eth sòn graet de sable en aguest encastre, atau coma ac hèn en encastre social en tot proporcionar trabalh a persones discapacitades de tres centres especiaus (La Torxa, Shalom e Aspros).

Es frais Alemany vòlen mantier era esséncia originau: productes naturaus e matèries prumèras de proximitat entà elaborar productes simplaments boni e sanitosi que les permeten assolidar ua empresa mejana. E tot açò des dera fabrica d'Os de Balaguèr, un lòc e entorn ideaus, a on neishec era sua istòria e a on les agradarie continuar escriuent-la un arramat d' ans e de generacions mès.

Se vòs mès informacion sus Torrons i Mel Alemany, consulta era plana web: <http://www.alemany.com>

## VOCABULARI E EXPRESSIONS

**Postguèrra:** periòde immediatament posterior a ua guèrra.

**Apicultor:** persona que se dedique ara cria d'abelhes.

**Floracion:** procès de formacion des flors que compòrte era transformacion dera gemma vegetativa en gemma floru.

**Bresca:** estructura de cera deth brinhon construïda per abelhes e d'auti imenoptèrs, composada de cèles prismatiques exagonaus e destinada ar emmagatzematge de mèu e de pollèn e ara cria des larves.

## SINONIMS

**Esclat:** Explosion.

**Recèrca:** Estudi, investigacion.

**Ideal:** Adequat, idoni.

## 1 AUEM CURIOSITAT



1. En quini moments deth dia e en quini plats, aliments o begudes podem ahíger mèu e minjar-ne? T'agrade? En minges soent?

.....

2. Sabes quini tipas de mèu i a e quines son es sues propietats? Ena plana web de Torrons i Mel Alemany trobaràs aquesta informacion (en apartat La Mel). Lieg-la e comenta-la en classa.

.....

3. Com explicaries qué ei era "innovacion"? Cres qu'ei un element diferenciador d'ua empresa?

.....

4. Cerca en internet quina ei era mission e valors dera Fondacion Alicia (<http://www.alicia.cat/ca/alicia/la-fundacio>). Comenta qué en penses de çò qu'as liejut en classa?

.....